

**Nunatsinni kommunit akornanni danskit “Kommune Kredit”-ianut assingusumik pilersitsisinaanermik Naalackersuisut pitsaaqutunik pitsaannequtinillu misissueqqullugit pequneqarnissaannik inatsisartut aalajangiiffigisassaattut siunnersuut. Misissuineq aningaasatigut periutsit qanoq ittut atorneqarsinnaanerannik siunnersuutunik imaqassaaq, misissuinerlu UPA2023 nallertinnagu inatsisartunut ilaasortanut agguanneqassaaq.**

(Inatsisartunut ilaasortaq Jess Svane, Siumut)

### **Akissuteqaat**

(Aningaasaqarnermut, Aatsitassanut, Inatsisit atuutsinnerannut Naligiissitaanermullu Naalackersuisoq)

Aallaqqaasiullugu Naalackersuisut sinnerlugit inatsisartunut ilaasortaq Jess Svane kommunit aningaasaqarnikkut inissisimaffiat pillugu saqqummiussinera qujaffigerusuppara.

Siunnersuuteqartup kommunit taarsigassarsisitsisarfilionnissaannut periarfissanik qulaajaanissaq kissaatigaa. Tassani qallunaat taarsigassarsisitsisarfiat KommuneKredit isumassarsiffittut innersuunneqarpoq.

Naalackersuisut qangali qallunaat oqartussaasuunik nunatsinni kommunit qallunaat kommunekreditimimut aaqqissuussinerat aqutigalugu pitsaasunik taarsigassarsisinaanissamut pilersitsinissaq pillugu oqaloqatigiissutiginnipput. Siornatigut nunatsinni kommunit suliniummut tassunga soqutiginninnertik oqaatiginikuuat.

Oqaatigineqareersutut qallunaat kommunekreditimik aaqqissuussinerat peqatigiiffikkut Kommunekreditikkut aaqqissuunneqarpoq. Peqatigiiffimmit taarsigassarsinikut peqatigiiffimmut ilaasortanngortarput. Peqatigiiffiup ingerlanneqarnera ilaasortat akornanni taarsigassarsianut pisussaaffeqatigiinnermik tunngaveqarpoq. Peqatigiiffimmi ilaasortap taarsigassarsianik akiliisussaanini naammassisinnaanngippagu, ilaasortat sinneri akiliisussaaneg tigonissaanut pisussaaffigaat. Tamatuma saniatigut peqatigiiffiup taarsigassarsisitsisarnermik ingerlatani Europami Japanimilu pappialat aningaasanik nalilinnik niuerfinni, pappiaqqanik nalilinnik tuniniaanermikkut aningaasalersortarpaa. Piujuartitsisumik pappialat aningaasanik nalilinnik tuniniaaneq suliniutinut avatangiisinik qajassuartunut aningaasaliinerni taarsigassarsianik matussusiisarpoq.

KommuneKreditip taarsigassarsitai amerlaneri tassaapput qallunaat kommuniini pilersuinerlut ingerlatseqatigiiffii, taakkulu taarsigassarsiaasa annertussusaat nikerartorujussuupput. KommuneKredit 2020-mi katillugit 192,5 mia. kr.-nik taarsigassarsisitsivoq.

Ullumikkut KommuneKreditip ingerlatsinera Qallunaat Nunaanni kommunit nunap ilaasalu taarsigassarsitsisarnermik peqatigiiffiat pillugu inatsit nr. 383, ulloq 3. maj 2006-ikkut malittarisassiuunneqarpoq. Inatsit § 24-mi inatsisip Kalaallit Nunaanut atuutinnginnera

aalajangersarneqarpoq. Kalaallit Nunaanni kommuninut taarsigassarsiat KommuneKreditimi ilaatinneqalissappata, inatsisip allangortinneqarnissaa pisariaqassaaq. Taamaammat qallunaat oqartussaasui qallunaat KommuneKredit pillugu inatsisaata allangortinneqarnissaa pillugu inatsisissatut siunnersuut ukioq manna aasartinnagu tusarniutigalugu nassiunneqassasoq isumaqatigiissutiliorfigineqarput. Inatsit allangortinneqarpat qallunaat ministeriata akisussaasup Namminersorlutik Oqartussat, qanoq Kalaallit Nunaanni kommunit KommuneKreditip akisussaaffiata ataaniittunngornissaat pillugu isumaqatigiissutiliorfigisinnaanissaanut piginnaatinneqassaaq. Naatsorsuutaasumik inatsisissatut siunnersuutip akuerineqartussami, Namminersorlutik Oqartussat, qallunaat naalagaaffiata KommuneKreditillu akornanni ingerlatsinissamut isumaqatigiissummik, aaqqissuussinerup Kalaallit Nunaanni atuutsinneqarneranut atugassarititanik erseqqinnerusunik aalajangersaasumik isumaqatigiissusiortoqassaaq.

Ingerlatsinermut isumaqatigiissummi ilaatigut kalaallit kommuniisa peqatigiiffimmit taarsigassanik akiliisussaannermt aalajangersaasoqassasoq naatsorsuutigineqarpoq. Ilaatigut tassa imaappoq, Nunatta Karsianit kommunit taarsigassarsiai qularnaveeqquserneqartarnissaanut piunasaqaateqartarnej naatsorsuutaassasoq. Taamatut qularnaveeqqusiiinissaq Nunatta karsiata qularnaveeqqusiisarnera pillugu Missingersuutit Naatsorsuutillu pillugit inatsimmi malittarisassat atuuttut naapertorlugit suliarineqartariaqassaaq.

Taarsigassarsisitsisarnermi aaqqissuussineq kommunit suleqatigalugit ilusilerneqassaaq.

Taarsigassarsisarnermik aaqqissuussineq inaarutaasoq immikkut Kalaallit Nunaanni inatsisikkut tunngaveqarnissaa pisariaqassappat, tassunga siunnersuut Inatsisartut 2023-mi upernaakkut ataatsimiinneranni saqqummiunneqarsinnaassaaq.

Naalackersuisut Kalaallit Nunaanni kommunekreditimut assingusumik aaqqissuussaliornissamut suliaqarnerat ingerlareermat, siunnersuut manna itigartinneqarpoq. Tamannali siunnersuuteqartup anguniagaanik isumaqatigiinneq tunngavigalugu pivoq.